

Epazaazi

Epazaazi Mwaalyaraavina Pikariyikwia' Poli Yavikaryakesi.

1 ¹Polinyi yikwia da' pikarya yavikarivanigeinyi. Gotiyai gamire simunyavi mena kanyidahilaka' Kiraazitiyai Jizaazai Nyidaasadeinyi yima'ne Apozeliyai. Gotiyare tewaanyaihiri Gotiyai yihithahilakakeihi Anga Epazaazi mwaalyaihirina yavikarivanige. Kiraazitiyai Jizaazari wilamwaaihasa'na Kiraazitiyari diragina limwadivisaihirina yavikarivanigeihilyi. ²Gotiyai Nenimaangelyi Naanga Jizaazai Kiraazitiyalyi sanidaai yanga tewaanna yihigaimwagika! Kirimire kwaamu'nanyabwi yihwarana!

Kiraazitiyarina Gotiyai nemire kuryaraavina tewaanya nejaavade'nesi.

³Kiraazitiyarina Gotiyai Kiraazitiyari wilanemwaaihake'na Sigunyaviya tewaanya naanga yuya nemire kuryaraavina yanga nejaavakengi. Sare'na Gotiyari nemire Naanga Jizaazai Kiraazitiyare Ganimaangeri tewaanya yilaaya maryaana! ⁴Sare' kigaakuna Gotiyai Kwaakeva' mwakyaakegaa' neminyina yawi'na “Sahwara nimirera yima'nipika! Nyibwaalivi wilamwaai'bi'de'na sahwara tewaanyara yima'nipi'dere. Niminyaba yiwetawakya maayara yima'nipi'dere.” Neminyina sara yawi'na yakabaabi' mi'na nedahilakyya! ⁵Sarei kale wiada tewaanya wivu'nada sinnawi neminyina yawi'na “Kiraazitiyai Jizaazai balade'na niminyi nyibwaalivaangera wimwaaihideinyi!” Gotiyai nayaa yawi'na “Tewaanyabwi yima! Sara yideinyi,” sara yawi'na yadei sara nedahilakyya! ⁶Kiraazitiyarina yilaaya wivu'naderina Gotiyai yange'na tewaanna negaimwagakelyi. Yi sasarei sare yanga gaimwanga byaannakevina sahware yilaaya naanga wiaana! ⁷Kiraazitiyai sai balaka gannya tawevina wila nevwiyinikeinaavi nemubake!

nemire yiwetawakyanna marasi'nikesi. Sare'na Gotiyare yanga gaimwangebwine aaya kaavilyanna sara neyakengi. ⁸Sai yanga yanga tewaanna naanga negaimwagakengi. Gotiyai simunya nawi'nyaviji siduta tewaanyaburiji gamire yanga gaimwanga sabwi nejaava'. ⁹Sarei gannya simunyavi yawi'na “Kiraazitiyarina tewaanna yima!” daka sinnawi sagaa' lika yulyasa' wa'di'nyi dahaasagaa' gamire yoimavajalikurakya sa' ku'maayaba neyibwaridaakwa'. ¹⁰Pigasa yuyagasa mi'na yaka nawi'nyagaa' dahilakyaakegaa' sinnawi yawi'na “Kiraazitiyai balade'na yuyangi Sigunyaviyaji Kwaakevakijaji sangi kye'mwannemwaaaha'muji Kiraazitiyai Minyaginyai maremwaalana!” Sara yawi'na yaakebwina dahaa' yuyangina Kiraazitiyai Naangei mwaali'. Sare' neyibwaridaakwa'.

¹¹Gotiyai yawi'na “Sara yideinyi. Simunya nayaa yawira'muji yideinyi.” Sara yawi'na yake'na yuya yadelyi. Sare'na Gotiyai aayawidaa'nyi mena yawirake'na sare'na nedahilakya' “Sahwara nimire tewaanya maapika! Kiraazitiyari kwilamwaaaha'muji nimirera mwaabika!” ¹²Sare'na nemi Kiraazitiyari wi'nona dahaa' sinnawinyaina Kiraazitiyari nayaa yemwaaihoine. Gotiyai yuya sara tewaanna yaka byaannyavina Gotiyari yilaaya naanga wiaana!

¹³Nabaai, sarimi Kiraazitiyari wilamwaaihasa'na avaa'ina yihya'. Sarimi yagaala nebulya' kadika wi'ne'. Sa' yagaala tewaanya' Gotiyai yihivadaihasamaarakesi yagaala sa'. Sarimi kadika wi'neva Kiraazitiyari kalimwagare' Kuryai Tewaanyari yi gamire yavikwajikeri yihizaava'. Yihizaavake'na “Gamireinera,” widivaniga'. Kurya sarina Gotiyai yune naanga nebulya'na widakelyira. ¹⁴Gotiyai yawi'na “Dahaa' sinnawinyai Kuryai Tewaanyari wijaawe'na nimirera dara yawipika! ‘O, Gotiyai nedake Sigunyavi naanga tewaanya yuya nejaavadelyi.’” Gamireinaavi yuna neyaaroyiyagaa'na yuya daza nejaavadelyi. Sare' gamire byaannya'na yilaaya naanga wiaana!

Poli Gotiyari widake'nesi.

¹⁵Yuya sarevi nimi sainyi wi'nyina “Anga Epazaazi mwaalyara Naanga Jizaazari nayaa limwamaniga'. Gotiyare tewaanya yuyaraavina tewaanya wivu'naderera,” wi'nyina yena ¹⁶kwadika mwamujainyi sariminyina Gotiyari yilaaya wiadi “Su! Su!” widadinyainyi. Gotiyari widadinyagaa' sariminyina yawi'di widadinyainyi. ¹⁷Sariminyina “Nemire Naanga Jizaazai Kiraazitiyare Gotiyai, Nenimaanga byaannakei sahwaravire kuryaraavina simunya nawi'nya' wijaavana! Sahwaravina gami sahware yunebanna wijalangesakinana!” dena widadinyainyi. ¹⁸Sarimire simunyangi gamire baake' kwakoji gamire nebulya' nayaa danganyide'nanyi. Yi dara jawiranganyide'nanyi. Sahwai yihizivwaramaarakevina yemwaaidivisabule! Yemwaaalya sabwi yawiramaapikaji! Nabaai, Gotiyare byaannyavine nawi'nyannanya

gamirena gannyaihirina yihizaavadenge! ¹⁹Nemi limwange'neinaavi gamire diraginya naange! neyivanikevina gannya di'naka naangaange' yuya wavila'de' wijiwaanana! Diraginya sa' naange! ²⁰Kiraazitiyarina yake' avaa'yasi. Diraginya sasi Kiraazitiyari bainikeraayawi yidikaavaka Sigunyavi diraginyaba gamire aangasimagi walamwaa'ha!. ²¹Saba munya ke'beva Kiraazitiyai Naangei maremwaali!. Kiraazitiyare diraginya' maremwaaidivita yuyaraji ga'maaniya yuyaraji diraginya yuyaraji naanga yuyaraji saraavire diraginyangi wavila'desi. Nabaai, yaya makinikeraavi kekyiri' munyaba maremwaalikelyi. Dahaasara, Kwaakevakiya yaya naangejiyara gaveraavina mi!. Aawa. Sigunyavi mwalaadehaasa yaya naangejiyaraaavi Naangei maremwaalikelyi. ²²Dahaasara, Kiraazitiyai maremwaideva Gotiyai yuyaraavi wimwaa'ihada Kiraazitiyare sivilyiraari amwi yuyara mwaaiha' maalikera. Nabaai, Gotiyai Kiraazitiyare kusilaanyainaavina nemire Naangeri wimwaa'hiwa' yuyanna. Sai nemire Minyaginyari wimwaa'hiwa!. ²³Kiraazitiyare kusilaanya' yi sa' gamire kilaakejiki. Sare' neminyi Kiraazitiyare kilaakejikiyainaavi nemwaa'hiwakesi. Kiraazitiyai sara nedada gannya diraginya' nejaavada gannya simunya'na yivanigo'nera. Kiraazitiyai Sigunyavi, Kwaakevaki yuyangi yuneba wilamwaaideri gamirena yuna wilamwaa'ihoinera.

Kiraazitiyarina baryaina mwaaiho'nesi.

2 ¹Kigaa' Gotiyarina sarinnya kuryara balesaihilyi. Gotiyari wanganakina yeva kayaa'nanyanna, yiwetawakyanna balesaihilyi. ²Saregaa' Kwaakevakiyabwi kayaa'nanyaburi kaanya yamaryadivi' yimakeraaviji kulakengiji maremwaidei yihusavi mwaaide sarebwi limwadivi' mwaalesaihilyi. A'mwera Gotiyari galyekivaimanigasaraavi maremwaali' kurya kayaa'nanya sai. ³Sara galazekivalesaraayaba nemi yuyaina kayaa'na mwaalo. Nemire kilaakevine dika neyidada nemire kilaakejika "Sara tewaanya' nyiwaka," nemire yawita "Sara yideinyi," yawi'daa yago'nera. Sareina sara yago'na Gotiyari a'mwera kayaa'na mwaaidivita yuyaraavina sinna tika wida'daasi tadevaai'bi' kayaa'na yoinaavi kaneramadike'nera.

⁴Kiri' Gotiyai kale gaimwanga naangaangevi aaya kaavilyai gamire tewaanya wivu'nya naangebwi neminyina tewaanya wivu'nakeburina Kiraazitiyariji gaala nemwaa'ha!. ⁵Nemi Gotiyarina yiwetawakadaawojiyavina Gotiyarina nemire kuryara kuna baidivi' kiri' "Kiraazitiyari yidikaaveri wilamwaa'ihima!" dake'na Gotiyai neyidikavamwaa'ha!. Gotiyai sariminyi yange'na tewaanna yihigaimwadevina yihivadaihasamaarakelihilyi. Yi yuyainaavi gaala nemwaa'ha!. ⁶Gotiyai neyidikavamwaa'ihaka nabaai, Kiraazitiyari wilamwaa'ihoinaaviji Kiraazitiyai Jizaazariji

Sigunyavi maranemwaaihwake'na maremwaaimanigoinera. ⁷Gotiyai “Divi sagaa' yuyagaa' gazagaasagaa' yima'nadehaa' nimire yanga wigaimwangeburine aaya kaavilya naangaange yuyaraavi wijiwaainima!” daka maranemwaaiha'. Sahwai yanga gaimwangebwina Kiraazitiyai Jizaazarina bwiwanna neyakebulyi. ⁸Sare' dare'nesi. Gotiyai sariminyi yange'na tewaanna yihigaimwadevina Kiraazitiyari limwadivisa'na yihivadaihasamaarakeihilyi. Sarimi wawinya yina yadivisa'na yihivadaihasamaarakeihi mi'. Aawa. Sahware sihumalesira. ⁹Sare' Gotiyai yawi'na “A'mwe pwai kwai dara nadathika! ‘Wawinya diraginna kye Gotiyai nyivadaihasamaarakeinyi. Tewaanyainyi,’ yawi'na yaka sahwai yange'na nevadaihasamaarakesi. ¹⁰Sare' dare'nesi. Gotiyai mwaaihoinaavi mudikeinaavi newaka!. “Sahwara mi'na wakengi sana sana yamaripika!” daka Kiraazitiyai Jizaazari wilanemwaaihaka tewaanya yaadeinaavi mudikeinaavi nemwaaiha'.

Kiraazitiyari wilamwaaiho'na avaalyainaavinesi.

¹¹Sarevina yihithima! Sarimi Juyaraavidaa'nyaihi mi'. Aawa. Ajimya yuyangiyaihilyi. Juyara kunnya asaji kilaakejikaavi da'nyina yadivisara sariminyina dina “Sahwara kunnya kilaakejikaavi mada'nyadivisarera. Maaverera.” Kigaa' mwaalesaihirina ayina jawirila! ¹²Sagaa' Kiraazitiyai maayaihilyi. Gotiyai a'mweraavi dahilakyaaka Yizireliya yita savaaki menyaba mwaalesaihilyi. Gotiyai gamireraavine yune naanga nebulya'na wijavurine wilimwagarakejiiyaihi mika. Angavaayaihilyi. Kwaaka davaki Gotiyamaayaihi mwaale'. Nabaai yemwaaalyabwi maayaihilyi. “Gotiaryaba mwalaadeinera,” majaihilyi. ¹³Kiri' dahaasagaa' Kiraazitiyai Jizaazari wilamwaaahasaihi Gotiaryawinna yihimakabiwakeihilyi. Kiraazitiyai balaka gamire tawe' bwalaravake'na menya keimwi mwaalesaihi Gotiaryaba aya kibanna yima'naabiwaasaihilyi. ¹⁴Sare' dare'nesi. Kiraazitiyai sahwai narya' wakinkelyi. Nabaai, Juyainaji Menyaihilyi avaalyainaavi kanemwaaiha' nemire munya yirila nediwagakelyi. Sinnawi Juyara keiba mwaalesa' Menyara aagaiba mwaalesa' tinnyaba yikamaangebwi kaanya tinike' warakesi. Sare'na sinna tika widavakerera. Kiraazitiyai sahwai gamire kilaakeji' yisavi balake'na kaanya tinike' wo'dalasi'nakelyi. ¹⁵Juyainaavire Kiwinya', kiwinya dinikeji kimaaka dinikeji yaasiwa'nanyabwi wakaka kaanya tinikebwi wo'dalasi'nakelyi. “Nimi narya' waka'muji yita pivakaai warikeraavi yita gavevakiyara niminyi wilamwaaihima!” daka wo'dalasi'nakelyi. Avaalyaina mwaaiho. ¹⁶“Niminyi kaanya tinike', yikamaangebwi tamaka'muji, yi, nimire yita yovihirarannikevina yuyavakaalyi Gotiyalyi yirakuramwaaihima! Yi nimire kilaakejisiyara avaalyara yima'nipika!” daka wo'dalasi'nakelyi. ¹⁷Sare' Kiraazitiyai baka yuyaraavi yagaala tewaanya' narya'ne'

widakesi. Menyaba Maaveihi Gotiyari myawiryaihiri yihithake' aya kiba Juyaina Gotiyari yawi'daanyainaavi nedakesi narya'. ¹⁸Sare! Kiraazitiyai neyake'na Kuryari Juyainaavinaji Maaveihirinaji nejaava'. Sare'na Nenimaangeryawinna wawaaji dinaade'nanyi.

¹⁹Sarevidaa'nyi sarimi Juya mamwaalyigaisaihi Gotiyarina kuna Maavera angavaayara mi'. Wa'mwa'divisaihi kuna mamwaalyiga'. Kuna gabinyaihi mi'. Aawa. Gotiyare angeba mwaalyaihi Gotiyare tewaanyaraji mwaaihasaihilyi. Gotiyarenidakihilyira. ²⁰Nabaai sarimi Gotiyare ange'bisaihilyi. Nedaasadeinaji Gotiyari wi'nawijiwaakadivisaraji minye laannikeinaavi sarimi Gotiyare angesi. Kiraazitiyai Jizaazai sahwai munyaba mijamaange' pwiynikelyi Naangei. ²¹Sahwai anga yuya' pwiynika nemi yuyainaavi nelimwaga'delyi. Naangere anga tewaanya'na mannikeinaavi nemwaaihadelyi. Sara neyada yuyagaa' tewaanyaina yima'nadaanyainera. ²²Sahwari wilamwaaihasaihilyi nemiji pwaraji sainaavi mannika angevi Kuryai wilanemwaali' Gotiyare angevi.

Poli Maaveraavina wawinya yake'nesi.

3 ¹Yuya sa'na Gotiyari widivanige. Sainyi Polinyi ajimya yuyangiyaihiri widina “Kiwinya maayaihiri Gotiyai yihimaarannehilyi,” widina yihye'na sinna tika widavakera kalavuzangevi nyimwaaile'. Kiraazitiyai Jizaazare kalavuzainyi. ²Kadika mi'na wi'nipija' “Gotiyai Polimi widina ‘Maaveraavine' nimore yanga gaimwangeburine wawinya' ja!’ widina yakei daaka!” ³Gotiyai kigaa' yawi'na “Maaveraji nimirera yima'nipi'derera,” yawi'na yake' lika yulya'di'nyi Gotiyai nyibwaridaakwa'. Yoimavajalikurakya sabwi pikarya maali'na mi'na yavikariwa. ⁴Sarimi yagaala sa' tinna wanganapiji dara danganyide' “O, Kiraazitiyai a'mweraavina yake' yoimavajalikurakya'ne' Poli mi'na yawi'manikei daaka!” ⁵Dahaa' lika yulyarya'ne' gamire Widaasade giri'maayaraaviji gaminyi wi'nawijiwaakadivisaraaviji Kuryai wijalangasakakabaabi' kigaa' mijiyima'nigavya piningi a'mweraavi sara myibwaridaakwa'. ⁶Yoimavajalikurakya' dara dinikesi. Ajimya yuyangiyara yagaala tewaanya' wi'nadivi' Kiraazitiyai Jizaazari limwadiwi' sahwari wilawimwaaihade'na sahwaraaji Juyaraji Gotiyare tewaanya yuyanna ye'mwannamaapi'dere. Nabaai kilaaka gavejikiyara ye'mwannamwaabi'de. Nabaai Gotiyare yune naanga nebulya'na wija' ye'mwannajapalamaapi'dere. Sara dinikesi.

⁷Yagaala tewaanya sa' widadinyainyi. Gotiyai yange'na tewaanna nyigaimwada yange' nyijaavada gamire widaayadinyainyi nyimwaaiha'. Sai diraginna yaka wawinya sa' kanyijaava' yagaala tewaanya' diraginna widadinyainyi. Nimi yawi'manige. ⁸Nimi maalikeinyi. Kiraazitiyare tewaanya pwara naangerera. Maalikeinyi kiri' Gotiyai yange'na tewaanna nyigaimwada nyida' “Kiraazitiyare tewaanaanga naangenna

ajimya yuyangiyaraavi duthathe'na githaasiwa. ⁹Nimi tewaanyabwi sinnawidaa'nyi niminyi lika yulyakyenya' dahaa' yويمavajalikurakyabwi yuyara wangabi'de'na githaasiwa.” Gotiyai yuyangi wakyaakei sara yakelyi. ¹⁰Lika yulyaryaake' dahaa' ku'maayaba wari'. Gotiyai “Kiraazitiyari wi'nya'nera kusilaanyara mi'na maaresabwina Sigunyaviya naangeraji diraginyaraji dara wangabika! ‘Gazarazaraavi Gotiyai tewaanna yadelyi. Simunnakei yawita tewaanaanga yawi'dela!’ ” daka gannya yanga gaimwangebwi nyijaava'. ¹¹Nabaai, Gotiyai kwaaka mwakyaakegaa' mi'na yawiryaa'na sara yake'nanyi. Gotiyai sara kyawiryaa' Kiraazitiyai Jizaazai nemire Naangei sara yake'nanyi. ¹²Sarevi limwadaa gaminyi wilamwaaiho'na nemi lika myadaa Gotiyai mwaalikewi gazagaasagaa' widadaanya'nanyi. ¹³Sare'na diraginna yihithima! Maaveihiri yihigaimwamanige'na pwara kayaa'na nyivaniga'. Sare'na yawita kwalaalya myawipina! “Kiraazitiyarebwi yagalya'mavaana!” myawipina! Sarimi tewaanna dimwaalyide'na daanga nyivimanike' yi sa' sarimire byaannyasi.

Kiraazitiyai neminyina kale wiade'nesi.

¹⁴Gotiyai tewaanna yaka sare'na kwadaai gilena Nenimaangeri widivanige. ¹⁵Sai Nenimaangei mwaalike'na Sigunyaviya yuya kuvinimaangeraji Kwaakevakiya yuya kuvinimaangeraji saraavine aaya kaavilyabwi wo'nikesi. ¹⁶Sariminyina “Sarei gamire diraginya yuyangi gamire byaannyaburine aaya kaavilyanna sarimire kurya kusawinyara diraginna yivaimwannemwaaibika! Sarimire munyikaavi gamire Kuryai diraginya sa' yihizaavoji sarimire kuryaraavi diraginyaraavi yihimwaaihana!” dena widivanige. ¹⁷Kiraazitiyari nayaa limwadivisavina sarimire simunyangi Kiraazitiyai kuna wilayihimwaaalana! Yisare pwipula kwaakevi diraginna waayikabaaibi', nabaai, ange' diraginna widaakunikabaaibi' kale nayaa yihyada diraginna jawiramwaalyila! ¹⁸Sara yapiji Gotiyare tewaanya yuyaraji Gotiyare diraginya' maa'divi' dara jawiramaarila! “Ai, neminyina Kiraazitiyari tewaanya wivu'nade naange' daaka!” Yuya bwakulaawika bwakulaawika aagangi wawilavikesira. Naangaangesi kale sa'. Sare'na sariminyina “Gotiyai gannya diraginya' wijaavana!” dena sahwari widivanige. ¹⁹Kale yada yuya' yinahu myawiri yipine' Kiraazitiyari kale yade' jawiramaarila! “Gotiyare yuya gami sari yuneba warikenna nemire munyikaavi, simunyangi yuneba wilanewarana!” dapiji sara jawiramaarila!

²⁰Gotiyare diraginya' nemire munyikaavi yade'na nemi Gotiyari widanganaaja yuyangiji yawiraaja yuyangiji wawilavade naanga naanga yadelyi Gotiyai. ²¹Sareri “Byaannakeigi!” widaana! Gotiyai kuda' Kiraazitiyai Jizaazai yuyaraavina balake'na Gotiyari “Byaannakeigi!” widaana! Kiraazitiyari limwange'nera kusilaanya yuyara “Byaannakeigi!”

widipika! Divi yuyagaa' gazagaasagaa' waragothehaa' yuyaina sara widaana! Naanga sahirisira.

**Kiraazitiyareina Kiraazitiyare kilaaka
gaveji'na avaalyaina mwaaiho'nesi.**

4 ¹Sarevidaa'nyi nimi Naangeri widaayadinya'na kalavuzangevi nyimwaaivesaini yihithaanganima! Gotiyai kagithahilaka' jiwwaramaata sareburi kaanya nayaa jamarya! ²Ginnya yaya' mamakilyadi kave yawikinyaigi kave yadi pwara kayaa'na gyadaapiji sinna tika yarai madayi gyada tewaanna dimwaala! Pwaraavina kale gyada kumire yagaala wi'nadi nayaa duhaimwana kale'na! ³Gotiyai narya' wakinke'na kwaamu'nanyaburi Kiraazitiyareraji je'mwannamwaala! Kuryai yuyaihiri yihye'mwannamwaaihake'na kilaaka gavejikiyaihi diraginna kuna dimwaalyila! ⁴Kiraazitiyareina gamire kilaakeji' gave piji'na mwaaiho. Gotiyare Kurya gave pwai nemijiyai mwaali'. Nabaai, Gotiyai yihithahilakake'na yihizivwaramaarakabaabi' nawi'nyaba tewaanyaihi dimwaalyide' yemwaaimanigata gavebwi wari'. ⁵Naanga gave pwai mwaali'. Naangeri limwadaanya gavebwi wari'. Bavitaazyabwi gavebwi wari'. ⁶Gotiyai a'mwe yuyainaavi Nenimaanga gave pwai mwaali' Kiraazitiyareinaavina. Sai yuyainaavi munyaba mwaalikelyi. Sai yuyainaavi diraginyainaavi nemwaaihada gamire wawinya yivanigo sahwarinera. Sai yuyainaavire munyangi wilanemwaaalikelyi.

⁷Gannya wawinya'na Kiraazitiyai yawi'na “A'mwerina sara wijaavima! Pwarina dara wijaavima!” yawi'na yada gazainyinaazainyia yanga gaimwangeburine nejaawa'. ⁸Sarevi Gotiyare bukuya' dara dinikesi.

Ke'mwewinna yilaawina yaka

Wila pwiyinikeraavi makilaawa'.

A'mweraavina sihumale yanga wijaava'.

⁹Sara dinike' yagaala “Yilaawina yaka,” be yagaalyavaka? Dara dini' “Sinnawi walaaba'. Kwaaka kewewinina walaaba',” sara dinikesi. ¹⁰Sai walaabakei avaalyai yilaawa'. Sai sigunyangina yilaawaka ke'mwewinna Sigunyavina yilaawaka “Yuya yuyangi wilamwaaalima!” daka yilaawa'. ¹¹Sahwai Kiraazitiyai “A'mweraavina sihumale yanga wijaavakelyi.” Sare'na gannya diraginya' wijaavada pwaraavi “Nimire yihithaasadinyaihi,” dahilakina. Pwaraavi “Gotiyare wi'nawijiwaakadivisaihi,” dahilakina. Pwaraavi “Yagaala tewaanya' mudikeraavi widadivisaihi,” dahilakina. Pwaraavi “Sipizipiya nimireraavi maremwaaina, wijiwaakadivisaihi,” dahilakina yakerera. ¹²Kiraazitiyarera tewaanyara naanga yune nebulya'nanyara yima'nipi'de'na sara dahilakina. Widaayabwina gaimwannipi'de'na sara dahilakina. Kiraazitiyare kilaakejikiyaina

gamireina diraginyaina simunnakeina yima'naade'na sara dahilakina ya'. (Anga nayaa mannikabaaibisaine.) ¹³Neminyine'na dahilakina yakera kunnya wawinya nayaa yadivi' kilaaka gavejikiyaina yuyaina Gotiyare Gawaalivi avaina limwagaraatheine. Gotiyare Gawaalivi avaaizimunya yawiraade'nanyi. Nemi a'mwe naanga yune nebulya'nanyaibisaina Kiraazitiyarina mwalaadeine gami kwaibi'. Kiraazitiyai tewaanyai simunnakei sahwai mwaalikabaaibi' a'mweina avaalayaina yinahu mwalaadehaa'nanyi. ¹⁴Sareinaavina “Kaimiraayara kuna namwaaibithika!” daka negaimwadivisaraavi nejaava'. Kwaasiyara kwaasi yagaala pini yihusa' pina pina do'mwadevaabi' nedadaapji kaimiraayaina namwalaadika! Kwaasiyara kayaa'nanyabwi yawi'divisara wabwiwayagaala dadivi' kwaasiya gevwi gevwi wijiwaakadivisare. ¹⁵Kaimiraayaina kuna mamwalaanna! Aawa. Kale neyadaawoji nebulya' widadaa tewaanna mwalaadeine! Kiraazitiyari yuna wilamwalaajaina yuya tewaanyabwina giryaadeine. Nabaai, Kiraazitiyai sahwai nemire Minyaginyalyi. ¹⁶Sai nemaremwaalikei nayaa nedada sara yaade'nanyi. Kiraazitiyare kilaake' yakabaaibi' sara yaade'nanyi. Sivila, ata, kihita, kadika saza miwi'nika, dahaala yuya ye'mwannika, yuya sa tewaanna yinikejikira. Kilaaka yuyaji' nayaa yina yada girinikabaaibi' nemi gamire diraginya' ma'daa Kiraazitiyare pwaraavi wigaimwadaa “Diraginyara tewaanyara mwaabika!” dadaa nayaa wijiwakadaa Kiraazitiyare yuyaina kale neyada tewaanna mwalaade'nanyi.

Kiraazitiyari wilamwaaicho mudikebwinesi.

¹⁷Sarevidaa'nyi Naangeri wilamwaaicheinyi Naangei dare nyidake'na diraginna dara yihizalikurakima! Nayaa kadika dinyu'nyila! Ajimya yuyangiyaraavirebwina mwaaidivitabaabi' kuna mamwaaibina! Sahwaraavire yawita waryaanya wari'. ¹⁸Kumire yawiramaata jihinya'bi' wari'. Kumire simunya mi'na silaange wilarikevina kuminyi sidu'maayabwi wilarikevina Gotiyai gaalyabwi wimwaaiahdevuri menyaba mwaaihasare. ¹⁹Kumirebwina myawiri “Kayaa'na yivanigeinyi. Sabwi myiwineinyi.” Naangegaa' sara myawiryadivisara wagila muvwa'nyadera ata limwangebwi diraginna yina. Girikita'nanyabwina mijike'bi' wiadere.

²⁰Kiraazitiyarera sabwi myihiziwaakesaihilyi. Kiraazitiyari ma'mwaasahi gevwi yipineihilyi. ²¹Sahwarina kadika mi'na wi'ne'. Sahwari wilamwaaahasahiri yihiziwaake'. Jizaazari nebulya' wiiwarikabaaibi' yihiziwaakesaihilyi. ²²Sareihi, ayabulyiyaihi kigaa' sarinnya simunya yawi'divi' kayaa'na mwaalesabwi marasi'nipineihilyi. Simunya sa kayaa'nanyanna kwaasi yawi'na “Wabahilaake'nesi. Tewaanyasi. Yilaaya'nesi,” kwaasi yawi'na yada kayaaka yihiygidaasi simunya sa marasi'nipineihilyi. ²³Sarimire simunyaji yawisaji kuryaji

mudike yuna yihwakannehilyi. ²⁴Gotiyai mudikeihiri yihimwaaihaka gamibisaihi simunya nawi'nya' yawipineihilyi. Simunya sara yawi'divi' nebwina mwaaidivisavi nayaa yida'maraangebwi yina, giri'maayabwi tewaanna yina yipineihilyi Kiraazitiyareihi.

²⁵Sarevi kwaasi yagaala wija'nebwi dasi'nana! Wasi'na'gizi gazaigizaigi nebulya' ja'mweri duthana! Yuyaina Kiraazitiyare kilaakejikiyaina mwaaiho'na nebulya' duthana! ²⁶Pwai kayaa'na kyoji gimire sinna tika kagithavoji kiri' simunya nayaa maremwaala'gizi saigi kayaa'na myinna! Naangegaa' sinna tika magithavanna! Sinna tika kuna kagithavoji nyilyai gaai waidaawojiyagaa' sare' kayaa'nanyasi. Sinna tika sabwi yarai dimarasi'nana! ²⁷Naangegaa' sinna tika kagithavoji Saataani gimire simunyavi yawita kayaa'nanya nakadika! Sabwi myinnera!

²⁸Kukei maarakei kuna maaaranna! Aawa. Sai wawinya nayaa yana! “Wawinya tewaanya' asiraalyi ya'muji nigwimaayaraavi wijaapalyima!” dozi nayaa yana!

²⁹Ginnya maangevi yagaala kayaa'nanya mudinna! “Pwara yagaala nawi'nya' nyu'napiji yanga gaimwangebwi maapika!” da'gizi yagaala sa duthana! Sara kuda'gizi yagaala sa' wigainikeraavi, kadika wi'nya'neraavi diraginna wivaimwagathe'nanyi. ³⁰Pwaraavi kayaa'nanya kuda'gizi Gotiyare Tewaanyai Kuryari taanga nuyadika! Gotiyai dina “Ninnya Kuryari kujaava'muji nimirera yima'nipika!” dina yaka githahilaka! Kuryari wilamwaaihinya'na diraginna yawi'na “Sagaa' yuna neyaaroyiyagaa'na gamire yavikwajike' nejaava!” Yawi'na yivaniginyaigi nayaa dimwaala!

³¹Jikurya myinna! “Pwara kayaa'nanyarera,” myawi'dinna! Sinna tika yaasiwa'na magithavanna! Maanga, maiyagaala mudinna! Biral mudinna! Yuya sabwi dimarasi'nana! Nabaai kayaa'nanyabwi myinna! ³²Aawa. Ja'mweri bwiwanna yina ja! Sarina kale gyana! Kiraazitiyai balake'na Gotiyai gimire kayaa'nanyabwi marasi'nikabaaibi' pware kayaa'nanya gazaigizaigi minya mamaa'dinna!

Baakeburi tewaanya mwaaiho'nesi.

5 ¹Gotiyare kaimiraayaiginyi yilaaya givu'nadeigi mwaaihinyabaaibi' gamire mwaalyabwi ja! Gotiyari dimidina! ²Kiraazitiyai neminyineba kale wiakei neminyina balakabaaibi' kale gyada dimwaaideiginyira. Juyaraavire Ne sinnawinyara sipizipiyari yanga wijaaya'ne' dika nasi'nadaasi Gotiyai wabatirinya' winada yilaaya yakabaaibi' Kiraazitiyai tewaanyabwina yuna balake'na yilaaya yakelyi.

³Gotiyare tewaanyaihi mwaaihatabaaibi' ata limwangebulyi girikita'nanya yuyabulyi wabarannyabulyi sare sabwina yileyagaala madibina! Sarebwina pwara nyawipidika! “O, kayaa'na jivaniga!”

⁴Yagaala kayaa'nanyaji yimaka widivisaraavire yimakyagaalyaji

kayaa'nanyabwina yipaa'nyi yagaalyaji madipina! Gotiyareih
 wija'ne sabwi madipineihilyi. Aawa. Gotiyari yilaaya'na “Su! Su!”
 widipineihilyi. ⁵Sare' dare'nesi. Diraginna dara yawi'manigasasi.
 A'mwera ata limwangebwi yadivisaraji girikita'nanyabwi yadivisaraji
 pwaraavirengi wabarinnya yadivisaraji saraavi Kiraazitiyalyi Gotiyalyi
 mamaremwaalyi yikadera. Kirimire yovirawakiwaalya mamaari
 yipi'derera. Pwaraavirengi wabarinnnyabwi sabwi a'mwa'mwe, nyilyai,
 yita naangera, silaanga sazangina yilaaya yadivisabulyi. Sare avaalyabwi
 wabarinnnyabwina pwaraavirengi yawi'divisare. Gotiyari yilaaya
 myadivisare.

⁶Aane pwai kwai yaasiwa'nanyanna widina “Sara ya'gizi tewaanna
 dimwaaideiginyi,” kwaasi sara nagithathika! Sare' dare'nesi. Kayaa'nanya
 dazanna yadivi! Gotiyari galyekivaidivisaraavina Gotiyari sinna tika
 wida'da wiramadelyi. ⁷Sarevidaa'nyi sara yadivisaraji myinnera!
 Saraayawidaasi jahalya'makwodeiginyi. ⁸Sare' dare'nesi. Kigaa'
 sahwaigi jihinyasiyaigi kayaa'na mwaalaginya kiri' dahaa' Naangere
 baakesiyaigi tewaanna mwaaihi. Sareigi baakesiyara yigatabaaihi'
 kuna nayaa dimwala! ⁹Sare' dare'nesi. Gamire baakebwina
 mwaaidi tewaanya yuyaji nayaa yida'maraanga yuyaji nebula yuyaji
 sangineiginyi gimwaaihatheiginyi. ¹⁰Naangei Baakei sabwi yilaaya
 wigaidewwi yawiramaa'na ja! “Sai ‘Tewaanyabulyi,’ nyidathevwi
 yima!” sara yawira'gizi sara ja! ¹¹Jihinyasiya, yaasiwa'nanya
 yadivisa sara mye'mwannayinna! Aawa. Baakebwi nayaa ya'gizi
 kumire kayaa'nanyabwi jivwaridaakwia! ¹²Sare' dare'nesi. Jihinyavi
 kayaa'nanya lika yulya'divi' yadivisanna waginaka yagaala madipinengi.
¹³Baakevi yuya kyibwaridaakwa'gizi yuyara dara wangabi'de! “O, aaya
 kaavilya' sasare' daaka!” Sare' dare'nesi. Baake' pu'daawoji a'mwera
 sabwi yagalya'mavapiji yirikebwi yipinerera. ¹⁴Sarevi dinike'

“Se wakinyaigi dithikaaka!

Bainikeraayawi ayina dithikaaka!

Kiraazitiyare baake' givuradesi.

Dikaava'giziyaginyina simunya gizaavadelyi.”

¹⁵Sarevidaa'nyi ginnya mwaalyabwi nayaa jawika! Simumaayaigi
 mamwaaidinna! Aawa. Simunnakeigi dimwala! ¹⁶Yirika
 kayaa'nanyagasa warike'na “Dahaa' tewaanna yijihyiwana?” da'gizi
 nayaa sara ja! Yirika sa yaasiwa'na nabothika! ¹⁷Sarevi sidu'maayaigi
 mamwaaidinna! Aawa. Naangei giminyina “Sai sare' yana!” kyawiroji
 sare' ja!

¹⁸Aalya waainiya biyaaya'bita naanga maninna! Sare' yimaka
 nuyidika! Sarebwi ya'gizi kayaaka jihainade'nanyi. Saza maninna!
 Aawa. Kuryai gimire simunyavi yuneba wilagimwaalana! (Sai simunya'
 nayaa yuna gimaremwaalana!) ¹⁹Sareigi ja'mweri Gotiyare yagaaidaata,

Gotiyarina yiledaata daata wija'neji duthana! Ginnya simunyavi Gotiyari yilaaya naanga yadi Naangeri daata, yiledaata duthana! ²⁰Yuyagaa' yuyanna Gotiyari Nenimaangeri “Su! Su!” duthana! Nemire Naanga Jizaazai Kiraazitiyarina yawira'gizi sara duthana!

Kiyorinesi.

²¹Yuna wilagimwaalanneigi Kiraazitiyarina yawi'na “Naangelyi. Kave yawirima!” yawi'na yivaniginya'na ja'mweraavi kwaakewi dula'naka! “Dara yawi'mwa. Nimi maalikeinyi. Nya'mweraavi kadika wi'nima!” Sara dinneiginyi.

²²Balaange'gi, nemi Naangeri midinna yivanigovaabi' ginnya kwalaangeri kwaakewi dula'naka! ²³Kiraazitiyai gamire kusilaanyainaavi nemaremwaaide Minyaginyai mwaalikabaabi' kwalaangei gannya balaangevi wimaremwaaide Minyaginyai mwaali'. Kiraazitiyai sawai kusilaanyainaavi nevadaihasamaarakelyi. Gamire kilaakejikiyainera nemi. ²⁴Sare'na kusilaanyaina Kiraazitiyari kwaakeba walamwaaina yivanigovaabi' balaange'gi yuyangi ginnya kwalaangeri kwaakewi wila'na'na jithe'ginyi.

²⁵Kwalaangeigi, Kiraazitiyare kusilaanyainaavineba kale wiada gannya tawe' nemubya'nei wijaaya'nei balakabaabi' ginnya balaangevina kale gyana! ²⁶“Kumire kilaakengi aalya wiadinyabaabi' Gotiyare yagaalya' kumire simunyangiji munyikaaviji kyavada'galoji Gotiyarina tewaanyaraavi wimwaaihima!” daka Kiraazitiyai bala'. ²⁷“Aayagaa' niminyaba kusilaanyaraavi wimwaaihima! Sagaa' byaannakeraavi wimwaaihima! Kumire simunyangi munyikaavi girikita'nanya, nawi'nya mya'ne saza mwari yana! Aawa. Gotiyarera tewaanyara, girikita'nanya maayara mwaaibika!” daka balake'nanyi. ²⁸Sare'na ginnya kilaakejikina kale gyada nayaa maremwaaidinyabaabi' ginnya balaangevina kale gyana! A'mwei gannya balaangevina kale wiadei, yithaa, a'mwei gami sarina kale wiadelyi. A'mwei balaangevina yawi'na “A'mwe sa' ninnya kilaakejikira.” ²⁹⁻³⁰Sare' dare'nesi. A'mwera kunnya kilaakejikaavina sinna tika mudayaderera. Aawa. Wapaaya nayaa wijaavadivi' yuyagaa' kave maremwaaidivisajikera. Kiraazitiyare kilaakejikiyaina mwaaiho'na kusilaanyainaavi kave nemaremwaalikelyi avaalyabaabi'. ³¹Sare'na dara dinike' “Sarevi a'mwei gamire ganimaangelyi ganaangesi sayori yagalya'mavoji gannya balaangesi ye'mwannemwaaladelyi. Sara kyoji sawaai kilaaka piji'nanyayoi yima'nyikadedyolyi.” ³²Sara gave dinike' nebulya' naange' neminyina dinikesi yoimavajalukurakya sa'. Sare' dara yawi'manige' “Yo, Kiraazitiyalyi kusilaanyainaji sara dinike' daaka!” ³³Sara dinike' kiri' giminyina dinikesi. Kwalaanga gazaigizaiginyina kale gyadevaabi' ginnya balaangevina kale gyana! Balaanga gaza'giza'gi ginnya kwalaangerina yawi'na “Sai niminyina a'mwe naangelyi,” yawi'na jithe'ginyi.

Kinidakaavinesi.

6 ¹Kaimiraaya kwaigi, Naangeri wilamwaihinya'na gimaamaangelyi gwaangesi sayori dimidina! Sare' dare'nesi. Sabwi yija' yida'nanyasi. ²Dinke! “Ginnya gimaamaangelyi gwaangesi sayore yaya dimakila!” Kiwinya sa', kiwinya naange', yagaala yune naanga nebulya'na wija'ne' kininnake' sinnawinya' dinikesira. ³Yagaala yune naanga nebula sa' dara dini! “Sare'na giminyina ‘Yuyangina tewaanna wima'nana! Kwaaka davaki saaminyagaa' mwaalana!’ daka githiwa!”

⁴Kuvinimaangeigi, gimire kaimiraayaraavi yaasiwa'na karama'gizi yaasiwa'na sinna tika nudavadika! Aawa, kayaa'na kyapiji Naangerebwi nayaa yawira'gizi nayaanna dirama! Nayaanna duthana! Naangerebwina duziwaakya!

Yaasiwa'wawinyaraji maremwaaidivisaraji saraavinesi.

⁵Widaayadinyaigi, giminyi kilaakejikinei gimaremwaaidei sara kagithozi Gotiyarina lika yadi nayaa sara dimidina! Gimire simunya' gave piri'na nayaa yawi'di nayaa sara dimidina! Kirazitiyari duthaayidevaabi' nayaa sara ja! ⁶Gavegaa' maremwaaidei tinna gwangadaawoji “Wawinya tewaanya'na yilaaya nyimaryana!” da'gizi gavegaa' nayaa yijiwaala nyidika! Aawa. Yuyagaa' nayaa ja! Kirazitiyare widaayadinyaigi mwaaihinya'na Gotiyare simunya' ginnya kuryai nayaa yana! Sare' maremwaaidina nayaa ja! ⁷Sareigi widaayadinyaigi simunyavi “Nimi tewaanna yima!” yawi'di yilaaya'na nayaa ja! A'mwe gaveraavi duthaayideigi mika! Aawa. Naangeriji duthaayidevaabi' nayaa ja! ⁸Dara jawi'desi. Wawinya tewaanya'na Naangei gazai gazarina tewaanya ayina wijaavadelyi. Nigwiwawinyarinaji yaasiwa'wawinyarinaji wawinya' avaa'ina wijaavadelyi.

⁹Maremwaaidinyaigi, avaa'yabaabi' ginnya githaayaderi nayaa ja! Maiyagaala kuna madinna! Nayaa dara yawi'mwaa. Sigunyavi Nemaremwaaide gavelyi. Gimiji githaayadivisaraji saihiri avaa'ina yihimaremwaalikelyi. Sai a'mweri sinnyasi yayasi yawisasi yawi'da myikelyi. Aawa. Yuyaraavina avaa'ina yikelyi. Sara yawi'mwaa. Sare'na nayaa ja!

Nemire kuryara mala bwa'nya'ne'bi' yovirawakya'nesi.

¹⁰Yagaala pini yihithima! Naangeri kuna diraginna wilamwaaide'gizi gannya diraginya' gizaavada diraginnakeigi gimwaa'hana! ¹¹Kotiya Maryadei yawi'na “Sai kayaa'nanya kuna yana!” yawi'na yoji kwaasiya gyathehaa' diraginyaigi dimwaaide'na mwasaabya, pini Gotiyai gizaavade yuyajiyaigi diraginna ja! ¹²A'mwera kilaa'nakera tawanakeraji mala mabwa'nyivanigo. Aawa. Kurya kayaa'nanyara maremwaaidivisaraji

diraginyaraji jihinya dahaa' yimakera Kwaakeva' kayaa'nanyava' maremwaaividisaraji saraavi sigunyavi kurya kayaa'nanyara mwaavidisaraji saraji mala bwa'nivanigo. ¹³Sarevi Gotiyai saabya sasi gizaavade yuyajiyai malya'na maarina ja! "Kayaa'nanyagaa' malyagaa' yima'nadehaa' yikamaangei kanyiramoji diraginna daavima! Mala bwara'muji aayagaa' diraginna dathiwagima!" da'gizi maarina ja!

¹⁴Sarevidaa'nyi malya'na yovirawaka'gizi Romiyai aawilasaibisaigi gidaa'na ja! Munnaanya' Nebulya' divadathivainana! Yida'maraangebwi kihisavi yuna diraginya'na divaazi'ma'nana! ¹⁵Gotiyare narya'na yagaala tewaanya' yarai widadaanya' sivilyiraari divaazi'ma'nana! ¹⁶Nabaai, Naangeri limwadaanyabwi yuna saabya diraginya' dimaryivila! Yikamaangei mwasagala dika nadaawojiya padaawoji gimire saabya' gimarulyakedaavadesi. ¹⁷Naangei nevadaihasamaarakewi minyaginyavi dimwaahi'nana! Gotiyare yagaalya' Kuryai nejaavake' kwaari'masiraminya' gurimaanga yuneba woinike' dilimwana! ¹⁸Yuya sanna Gotiyari wija ja! Kuryai gihaimwadaawoji yuyagaa' Gotiyari diraginna duthana! Jithaangana! Dameigi nayaa tinna wangadi yuyagaa' Naangeri yuyanna diraginna duthana! Yuyagaa' Gotiyare tewaanyaraavina diraginna jithaangana! ¹⁹Nabaai niminyina Gotiyari duthana! "Gotiyaigi, 'Polimina yagaalya' kujaava'muji nayaa diraginna widana! Sahwai lika mi yada yagaala tewaanya' yomavajalikurakya' nayaa diraginna wijiwaakana!' da'gizi yanga duzaama!" Sara duthana niminyina! ²⁰Yagaala tewaanya'na Kingiyai Kiraazitiyai nyidaasadere wawinya' yivanigeinyi. Kigaa' Kiraazitiyarina widahe'na wila nyivwiyeta kiri! Kingiyare wawinya' yivanigeinyi. "Lika nyiwidika! Nimire diwija' diraginna widima!" dadi githivanige. Sareinyina Gotiyari duthana!

Yagaala aaya'nesi.

²¹Tikikaazai neya'mwei sahwarina nevu'nadei tewaanyai Naangere wawinya' diraginna widaayadelyi. Sarei niminyina yuya yihithathelyi. "Sahwara niminyineji nimi yivanigeji yawipika!" dena sariminyawinna widasiwaabe. ²²"Sarimi neminyinenna jawirila! Sara yawirapiji sarimire simunya diraginya jivaimwannyila!" dena widasiwaabelyi.

²³Gotiyai Nenimaangelyi Naanga Jizaazai Kiraazitiyalyi sanidaai neya'mweihiri kirinnya kwaamu'nanyabwi yihimwaaihika! Kale yihyadevwi Naangeri limwangebulyi diraginna yihizaayika! ²⁴Nemire Naanga Jizaazai Kiraazitiyarina sarinnya tewaanya yihivu'nada, nabaai kuna diraginna sara yihyada, yi saihiri yanga tewaanna yihigaimwagika!

Poli